

四庫全書

集部

欽定四庫全書

集部

雪樓集卷二十三

詳校官中書臣羅錦森

侍讀臣孫球覆勘

總校官庶吉士臣朱鈐

校對官編修臣楊壽楠

謄錄監生臣王泰雲

欽定四庫全書

雪樓集卷二十三

元 程文海 撰

銘

王融小孤山之子衍孫歲甲申加元服山翁祝
之曰維爾行美有文冠而字曰李蕃後十有
二年廣平程某訪梅於小孤山之下衍請其
說乃爲之銘以廣其意

大行之用一乾二坤坤道資生草木以蕃美暢四支其

吉維元匪直也文德行本根敬內義外如車兩輪孤山
之子石塘之孫視我銘詩勿替彌敦

心齋銘

并序

郭德基為張游道求此心齋扁余作心齋二字遺
之銘以申其義

人惟一心何彼何此天飛淵淪匪尺伊咫此之名立物
我對峙是非善惡相挺而起有齋翼翼昭晰表裏專名
曰心自我更始心耶齋耶心即齋已回不違仁知者夫

子如愚坐忘孔莊異指體認少差毫釐千里吾克吾已
吾復吾禮歸眎吾齋靈臺止水

福州路學二銘

并序

至元癸巳余至三山既謁夫子廟即脩學宮剏大
小學以來諸生作亭後圃為游息地落成之日天
新雨以時雨名之洎大德丁酉七月乃大脩廟學
越三月告成以其餘力築壇樹杏於亭之前發篋
中舊藏祖庭杏壇二大字張之竹溪黨公筆也浚

池左右取重允之義更時雨曰麗澤而繫以銘

杏壇

謂有人邪窅兮緇林謂無人邪洋洋乎金石之音斯道
何在日用常行厥臨孔昭參前倚衡夫子之德昊天罔
極仰瞻堂壇如有所立

麗澤亭

彼滋者澤矧兩而麗宛其相漸有友之義此湮而枯挹
彼有餘我潤而沃漑爾不足名川三百支川三千勉哉

作聖其淵其天

趙履道履齋銘

蟻封其旋車輪其曳奚道奚徑孰平孰陂蛇虺之頭虎
狼之尾危石薄冰慎哉舉趾

靜虛齋銘

并序

寂然不動者天地之體也感而遂通者天地之用
也天以陰陽化生萬物而人獨靈於其間者以方
寸之中備此理耳故記曰人者天地之心夫心之

體本靜而虛惟其靜故足以燭羣動惟其虛故足以納萬有倘克己之功不加此心之體不具則戰之以物欲塞之以吝驕而發揮形著於外者始與天地判然而不相合矣是以君子體乾坤之健順勉焉日孳孳焉至於體立用行範圍參贊則學問之極功也詹君雲卿以靜虛名其進脩之室蓋其識趣精詣志力強敏坐進此道不占有孚廣平程某敬而銘之曰

噫靈臺萬化宗如水止如鏡空鑑妍虫靡遁容來無迎
去無從一物無萬理融寂不動感而通此天德惟聖功
賢希聖將無同

尊經閣銘

并序

南陽書院既成乃葺舊閣謀藏書也會憲使歷山
公俾提舉學事者萃列郡校官板本書至因度之
其上以待學者彙經史子集為八架架有壁而加
扃鐫焉噫匪囚之也匪以為觀美也匪循故常而

資夸柄也亦曰讀之而已里非無儒也家非無書也惟無常師常產之憂是以有此學也於戲宮居而師友之又為之賦飲食以飲食之甚矣古之人不幸而不獲生於斯世也亦甚矣今之人幸而猶得聞古之人之言也可弗念歟夫聖人之言如天賢者之言如地諸子百家如萬物尊經猶尊天也

銘曰

厥初生民有哲有愚表之君師身為其樞亦既降只繫

訓之敷載陽載陰闔慘闢舒式如王金家國貞符豈無
衆言或翼或扶仰之彌高欲近而疏南陽之廬里黨之
學殿堂室門中仰崇閣集厥大成於此焉托擇焉執焉
孰焉復焉惟聖希聖惟賢希賢于以潤身于以豐國左
右逢原欲其自得傳道解惑亦思厥官刻此銘詩無廢
後觀

藏室銘

并序

讀書名山古人之事也三島之藏室老氏之藏也

三谷之藏室程氏之書之藏也藏之云乎亦讀之云乎銘曰

前數千載在方策如見其人後數千載有方策此心此身孰不靈於物乃謂席珍孰匪秉彝而曰覺斯民吾愛吾廬豈以專壑讀書名山尚友先覺方丈瀛洲玉室金堂遠莫致之吾有華岡挿架非藏佔畢非讀咨爾朋來問津三谷大德八年歲在甲辰暮春之初華岡子書

范陽許氏餘歡堂銘

讀書潤身治生潤屋歡信有餘意無不足人方劫劫我
則愉愉心廣體胖仁宅安居不名一錢朝衣東市一一
飄風所謂長喟那知許事一杯陶然歌枕前榮浮雲在
天曷其銘詩予攸好德異日升堂尚非生客

逍遙遊銘

有跋

光風霽月魚躍鳶飛熙熙皞皞浴沂詠歸彼逍遙遊意
得自我是將無同孰云不可漆園非古句曲非今吾名
此堂寔名此心歸去來兮吾亦荷蓀青山白雲相望一

笑

茅山劉尊師驅役風雨神鋒凜然而襟韻甚高意悟
飄洒留京蓋久非其好也今將言旋余深愛敬而莫
能留乃為書逍遙遊三大字以況其為人又為之銘
以篤永好君歸而揭之椽題乎則是余朝夕與君周
旋也

吳氏主靜銘

仁義中正以靜為主主之伊何天君內處不貳不參常

居其所以立人極以保天子水止之平鑑空之睹由中
御外厥用孰禦生色睟然見於其宇季札之孫請事斯
語勗哉進脩母念爾祖

母不敬銘

德之聚禮之興出與出居與居有克念孔子徒有弗念
視此書

孝里銘

四端之宰萬善之先秉彝之懿制行之全有虞烝烝標

爾萬世蔚其緇林曾閔不匱我行其野聞周於靳使者
式之書開之眉入出昕昏目在心守孰亡蒼旻孰不黔
首元聖之處奚闕而稱里仁為美所美非名亦有高人
其居曰栗黃中通理取材落實保茲之素企彼之崇通
德遐矣千年鄭公希聖希賢尚其永錫銘于閭左各共
子職

自牧堂銘

人心惟危如馬不羈出入無時勝虛抵巇不蹶則迷地

中有山高而能卑謙則象之天地鬼神咸貴於斯君子
法焉以收其馳如牧于垆白駒之維彼牧伊何不圉不
奚匪我其誰維天人師訓亦如茲驕慢自高非我法宜
以瓦鉄食衣壞色衣視退轉心鞭策常施與吾聖言不
期而期惟此上人白足赤髭謙光定慧我有世希自牧
之名夫豈自欺吾銘其堂誦吾所知欲徵吾言徵諸聖

辭

蜀冉惟良省身齋銘

聖人之學惟博惟約既達夫博乃守其約其約伊何忠
信傳習日以三省其道乃立忠謂盡已信謂以實傳之
於師習而勿失匪忠而忠匪信而信雖信雖忠於義已
吝傳必由聖以戒頗僻匪傳而傳習之何益是以曾子
卒傳孔道由思及孟萬世允蹈省身冉氏惟曾是企拳
拳服膺是亦曾子

肯堂銘

濟其美復其始構于此施孫子

聚齋銘

并序

郭靖州履字元坦沉敏端實好學不眩名其讀書之室曰聚齋廣平程某為之銘曰

古之君子學也為己不患莫知患不知此如彼衣錦猶尚之褻外雖閤然內則甚炳玉韞山輝珠藏淵媚苟有諸內物豈能蔽鼓鍾于宮聲聞于外謂人不聞我則已曠魚在于沼亦匪克樂謂人不見我則已惑莫見乎隱莫顯乎微翼翼其心曖曖其輝大禹不矜庶士交正顏

子若虛後世稱聖敝緼非耻懸鶉非窮君子存誠執乎
中庸郭氏元坦惟簡惟淡我銘聚齋以作爾監

虛室銘

即虛為室所苞則夥謂室曰虛其中有我由虛生白生
之者誰既云虛矣誰其見之粵有真義獨居其奧曰希
曰夷相與徑造視之不見聽之不聞我客戾止玄玄迎

門

鈍齋銘

鈞故恒割久則必訛驥於驚駘其行實多順流加颿抵
石敗波疾走翺飛終嬰禍羅維此君子焉知其他保此
鈍遲以毓天和百歲獨長如援魯戈美哉象賢一唯一
阿匪直緒餘其德同科吾有拙璞爾琢爾磋久不潰成
錐則屢磨銘以訊之今者若何

箴 贊

友敬堂箴

并序

長樂亦山陳公請余扁其所居之堂曰友敬申友

敬之義作為家訓以儆諸孫古今言行有關於天
典民彝者盡在是矣且求余言余何言作友敬堂

箴

兄弟之身初則一體痒疴疾痛孰彼孰已兄弟其弟匪
曰恩斯弟兄其兄乃分之宜是惟人倫是惟天命非自
外来惟友惟敬分財取少纖悉之惠食果取小直讓之
細然而性善於此著形一家和順千世典刑為兄克友
弗敬非弟干戈琴瑟何有於悌為弟克敬弗友非兄煮

豆燃其靡念厥生嗟嗟手足友敬惟心其和悃悃其肅
欽欽反是不思為犢為禽爾堂曷名敢告司箴

李府判家已延忠武王畫像贊

烈烈桓桓如河如山功極名完盛德之容維恭維寬幙
府同心戚欣燠寒儼其當年長劍高冠追隨凌烟尚永
弗刊

喬達之學士真贊

集詩句

顯顯印印示我周行俾民不迷俾爾壽而臧

喬達之內子真贊

集詩句

如山如河如鼓瑟琴宜爾子孫秩秩德音

玄武贊

數尺之藤萬縷之墨玄雲勃興靈物偈仄天君跣立臨
下有赫瞻之若夢卷之無跡茲其是耶知白守黑

貞義處士家傳贊

周司徒以六行教民曰孝友睦婣任恤吾觀李君其幾
之矣不然何惓惓於事若是而子又克肖益大之是家

也其不謂之行義之家歟

危槐坡真贊

待之不来呼之不應異哉槐坡斯之謂命

黃成性史學提要贊

并序

史之為書也博而雜其為學也煩而易遺出沒浩
瀚而不可執也必設羅落以張之混瀕闔闢而不
可窮也必立檢押以制之此史學提要所攸出而
始學者宜盡心焉故為之贊曰

清升濁墜厥既滋久有物有事膠葛紛糾削牘殺青水
委海受有窺其源涉足濡首惟江夏氏操網結紐婉而
成章弼彼天牖如珠纍絲如魚在留何千萬年誦之在
口吾觀世學使我心疚昔拙而臧今巧而莠襟裾馬牛
為世所醜此有要言毋廢而手惟江夏氏顏鑽墨守心
千古前身萬古後歌以颺之叶其節奏往茂藝林勗哉
不朽

李秋谷平章畫像贊

天作之君必擬之臣猗歟秋谷潛龍舊人輔道羽翼藹
然師友圖像青宮德義是取九居五位轉坤旋乾道同
志合匪人伊天萬國具瞻始會天意玉質堂堂儼廊廟
器身為道寄道以身弘孰道孰身穆穆迓衡道不計功
而功孔灼千載如新雲臺麟閣

白雲平章畫像贊

溫溫其恭廓廓其容堂堂乎拔俗之標槃槃乎學古之
胸宜夫致功則隆致位則豐身居廟堂之上神游丘壑

之中匪青山與白雲孰與吾心而可同

王仲澤真贊

二十四歲卒博學有名

吁嗟乎仲澤玉質而金聲矢直而砥平胡不能以久生
吁嗟乎仲澤何饜于學餒于福豐于德歉于位富于名
嗇于壽蓋所然者人也所不然者天也吁嗟乎天豈不
在所承承哉

陳氏三先生畫像贊

默軒

賡子颺

猗嗟子颺邁世之材三鳳之首多士之魁學足以尊主
比民氣足以摧奸斥回作室者方資以梗楠豫章為禮
者方賴以犧象雲雷四佐大幕曾未足少展其風之培
邈超遙乎羲皇之上翱翔乎河洛之隈千載之下拜公
像者凜然猶有生氣哉

澹軒

庾子京賡之弟

猗嗟子京古人之學四俊稱首後進先覺方力養於洛
西卿相莫能易其樂一振鐸於河東禮義化行乎干槩

豪如杜善甫望顏而氣下驚如李長源聞語而膽落留
金逆旅安知墮器之誤却賈園人不忍病馬之鬻百世
之後聞其風者不廉貪而敦薄耶

肅齋

元忠時佐庾之子

惟公弼父嘉祐名臣八傳至君為儒之醇刊偽落華冠
義服仁其止安安其動循循天爵既脩富貴浮雲政成
于家化及邦人訟者求直不言而信貸者告匱折券予
貧不忍羸牛食之終身附郭藝桑盜者莫親惟君之學

追古與鄰素髮朱顏廣袂長紳五柳有言無懷之民葛天之民

宋學士真贊

蒼然松栢之干霄粹然瑾瑜之出璞人稱尚德之君子
自言為善之最樂宜其身事四朝位列九卿登瀛洲上
玉堂而恐終歸於黃閣也

趙克敬真贊

岩松海檜鱗皴磊砢與風雲會文隱于內樸見于外不

知者謂此其神傳知之者以為天繪白雪老人獨曰此
鈍翁鈍翁也蓋屢百世而猶在

任東卿真贊

邈矣千載懷哉此賢先進之後後進之先春風池館晴
雪林園相逢一笑握手無言

徐佐卿墨龍贊二首

駕鴻濛兮上寥廓風雷相纏雲噴薄駭而視之墨池涸
収吾丹養吾素髯君來衆勿怖

說

適齋說

物各有所適坎井之蛙東海之鰲數仞之鷗九萬里之
鵬其處身之大小高下不齊而其適一也君子之於貧
富貴賤也亦然世之處貧賤者或怫然而熱中或悅然
而失志焦然若不能以終日一旦而富貴則驕則盈蓋
終其身而未嘗有一日之適是曾二虫之不若也誰謂
人為靈於物者哉豫章胡先生誠叟名其居室便坐之

所曰適先生方布衣時以明經史通詩賦進士業講授
鄉里其氣浩然其容澤然其議論軒昂震蕩聞者竦立
無一毫憔悴不自得之態既而位郡博士同時行輩袞
袞臺省矣或以先生名聞始授朝命又屈為海陵教官
先生不以居卑為羞處約為怨單車之任其志氣猶布
衣時真能適者也余謂適者無所往而不適不適者無
所往而適富貴而適可能也貧賤而適難能也能其所
難能豈不能其所可能哉先生今日之適如此他日之

適從可知也夫古之當大事立大功者類非悻悻小丈夫所能也耕於野築於岩漁於水濱若將終身及其出而任天下之重若固有之不少動其心焉所謂適則無所往而不適者也先生適者也當路多知之者行臺治書侍御史李元讓工小篆既為作適齋二大字而中丞徐子方詩以美之屬而和者十數余少從先生學知之尤深故為著其說至元二十九年夏五學生程某敬書

實齋說

草木之成為實何也以其種是則生是而不渝其初也羽族之孚亦然故孚亦為實人之所得於天者其生之理也實生之後而偽其人也非其天也盱之士陳櫟孟實以實名其讀書之齋初余未識人皆稱其賢謂其言也信謂其行也果純乎一實者也及既識則誠有如人所稱者焉嗚呼古今偽言偽行以欺世盜名者多矣能讓千乘者或不能不愠見於簞食蓋能勉強於其暫者未必能掩覆於其久也孟實與余相周旋於金陵廣陵

凡四載今年歸自京而孟實留吾家考其行如其言而終始如一日也則孟實之為實也不既實矣乎為之作實齋說至元癸巳暢月上弦廣平程某書

王肯堂遂慵軒說

翰林侍講學士王君名構字肯堂自號曰安野矣買宅於京師又榜之曰遂慵僕竊惑之夫安野君以文學被眷遇有列于朝正黽勉從事不敢告勞之時也去年留京師嘗為賦詩曰安野標慵豈必慵所以諷也而君意

殊不樂似以僕為不喻其意者僕之惑也滋甚會出使
閩海已受命不敢宿留亟就道故未暇為君竟其說夫
人生而父命之冠而友字之名與字固未必有所取義
而亦有取義者觀昔人所以名君字君之義豈不望君
以作室之事歟天下猶大廈也垣墉塗墍非一日所能
完棟梁榱桷非一木所能任臣之於君猶子之於父肯
堂而後可以構必乾乾必蹇蹇必夙夜匪懈庶幾乎畫
宮于堵而績于成也君有列於朝而欲安於野乎未可

也安於野猶未可而可以遂慵乎哉人固有身在朝廷而志山林者矣大槩野者君子之所不得已而非其所安也伊尹之耕野未遇則然終身所安不在是也裨諶之適野有謀則然平時所安不在是也晉公之綠野安矣君欲效之不亦太早計耶吾故曰君有列於朝而欲安於野乎未可也安於野猶未可而可以遂慵乎哉僕之惑殆不可解而君之意誠有所未喻也客有喻君之意者曰慵一也而有二焉有可慵者有不可慵者子於

父之事臣於君之事不可慵者也世之人世之人飲羽於市門之下血刃於風波之上終身役役以至於疲蕭行盡如馳而莫之或止此可慵者也而慵於此者幾何人哉君之所慵在是爾吁人有其非而遂其非遂之不善者也君有所慵而遂其慵遂之善者也而子何訾焉僕於是釋然曰客言當矣為人臣者公爾忘私國爾忘家夫一心於公事國事雖私事家事有不暇顧而况乎聲色勢利之所以奉身者而暇勤勤乎哉君之慵是也

僕之惑非也君能慵於其所可慵則必能不慵於其所
不可慵不慵於其所不可慵則必能如韓子所言之匠
氏如柳子所言之梓人以經營於斯世而天下皆將在
廣廈帡幪之中矣他日功成名遂而安於野僕當勞君
曰吾今而後知大矣哉遂慵之功敢書此以寄至元甲
午四月八日廣平程某書于三山憲司之繡綵堂

文矩名字說

矩所以為方之器也物非矩無以自致於方矩非物亦

莫著其為方之用蓋矩者梓人氏所謂角尺也必上下均平左右若一然後舉此而加彼推已以及人是以君子有絜矩之道然器非人不行用之則隨所施而無不中度弗用則亦自守其尺寸之常此君子又有藏器之喻孟軻氏以規矩方圓之至與聖人人倫之至並言夫豈徒者文掾名矩而字子方材器兼人如刃之新發木之向榮六翮既舉而風迫之也求余說其名字之義因書所聞以復之抑又聞方者地也非厚無以載體之者

輿也非輪亦無以行有弗思思則得之

靜山說

瀘川劉君求靜山說於廣平程某曰艮之象為山山有不遷之體焉故曰艮止也為學之道知止而后有定定而后能靜世以山為仁者之所樂因以仁者之靜歸之而曰靜山夫山固靜矣不靜惡能為山然山不徒靜而已也若曰山徒靜而已則觸石而出膚寸而合不崇朝而徧天下與夫不舍晝夜盈科而後進放乎四海者獨

非出於山歟蓋靜其體也動其用也言用不及體無本
言體不及用非道劉君體用之士也默而識之吾言初
不必竟

蕭文孫字說

文者道之著也天秉陽垂日星地秉陰竅於山川凡天
地間形聲之異品類之繁孰非是道之著而因其文而
文之者聖人也君為文武臣為周公聖莫盛於周故文
亦莫盛於周而又有夫子集其大成故其言曰吾從周

又曰天之未喪斯文也匡人其如予何文乎文乎豈翰
墨之謂乎為士而舍周公孔子宜何師乎吾故人蕭則
平之長子文孫既孤而字未立為之字曰從周且叙其
義以告焉尚勉之乎當使則平之友異日咸曰則平已
矣幸哉有子如此

劉時中字說

古人致禮樂以治身心惟恐湏臾之或縱以離於中和
也風氣既降家自為教人自為學賢知過之而愚不肖

者不及不得已而慎獨之訓生其防之於未萌者蓋甚微且密也然君子之中庸夫子之時猶言民鮮久矣然則不亦難哉劉君端淑老成言動有則觀其名時中而字仲謹必能守慎獨之訓而自防於未萌者中乎中乎抑將何以驗其為中乎苟能於人所不知已所獨知之地慎之慎之而又慎之其必能知之矣劉君傾蓋平生不日而又別故為之說以識予念

龍牙說

物之能神變無方者莫龍若也其蛻於江海之濱蓋欲遺其形迹之累以遂其神爾余嘗怪夫西方之學以遠離生死為宗至其梏於形迹則返有甚於世俗之為觀其於摧牙朽骨猶眷眷不舍又時出光氣舍利輩以眩愚盲不亦可疑笑已乎今或得殘片斷株於江海之濱曰此龍之遺也夫龍既已遺之矣靈於彼者乃取之知乎不知乎若通真雷尊師真得猶龍之學者也觀其赤手把茅於江干不十五年而千柱之宮岌然以起是可

謂能神變無方者矣又觀其為規必欲千載則比夫龍之所遺厥有重輕矣太初公探龍之穴不得珠而得牙因以贈師豈亦況其猶龍之謂予謂師之猶龍非他學猶龍之學荒唐無驗不可究者之比也喜而書以贈焉

蔣沂字說

言俗化之善者必曰齊魯然觀一變至道之云齊魯固自有差等也學者舍周孔奚師欲知周公孔子之所存舍魯何適澹然公子名沂而字師魯予知其非謂前希

曾而後轅尹以驚夫聲也亦非謂左曲阜右闕里而繫其迹也蓋曰周公孔子道之表也沂泗汶洙魯之望也務學必窮其源見道必于其本此命名制字之旨歟師魯志尚不羣材銳而年甚茂知道之方縱靶極詣當何所不至然予聞周公之治魯也尊尊而親親孔子之於魯也恂恂如不能言者欲尋二聖人之所存此獨非耶師魯其慎所師哉師魯名父之子且所從又往往皆名師前之說固已既聞而飽誦之矣於其南也并祝加餐

宗人萬選字說

蘄春宗人子祥之長子曰萬選字舜舉家學有源才業
駿茂教邑庠錄郡校皆無煩言而有令譽余自武昌東
過雪堂舜舉侍其父在焉因請余為其字說夫選於衆
而得咎繇舜之知人也而咎繇陳謨亦曰在知人人固
未易知知人亦未易而性能自知者然後能知人耳唐
虞君臣皆有明德氣合道同萬世師仰是以孔門心傳
亦以明明德為學者先務夫所謂明德即帝典克明俊

德之德咎繇德明惟明之德也人有此德顧吾所以明
之之功何如耳咎繇躬有明德是以陳謨則謨明弼刑
則刑明今子方職于學則明德新民是為先務異日致
君澤民於雍熙之世何莫非明德之用者然則脩身待
舉吾安得不為吾宗望哉

王天錫字說

魯人誦其君曰天錫公純嘏嘏者大而且遠之福也純
者全而不雜之名也天之予人者莫不善亦莫不純純

嘏即純德之所致也然不曰福而曰嘏蓋慶有餘而後其福大且遠也不徒曰嘏而必曰純者蓋吾之所為莫不善故其所遇亦莫不善也余友楚山王君以名其子曰天錫牧菴姚公因而字之曰純甫純甫又謁其說於余純甫名父之子方左右就養懽聲和氣雍雍盎盎其致嘏之道未可量至於純一不雜則問學之極功性分之終事是非他人所能與也子必勉之夫學問者何亦曰去其糠粃吾性者而已德而至於純非一日之積也

故又曰善不積不足以成名子必勉之

賴歸字說

平章政事安南國王來朝從行者賴安撫名歸謂余求其字與號愚按字書歸音三而訓各異切區韋者曰山貌切苦軌者曰山小而衆切丘愧者曰獨貌愚以其意推之山則山矣皆未盡其義也天下篇曰歸然而有餘靈光序曰歸然獨存然則歸之訓如曰衆山中之獨高者庶乎盡之於是字之曰伯高至若號之云者古無有

也然而因其名之有字而復字其字以示訓抑何傷乎
於是號之曰謙齋謙者地中有山之象也山高矣而不
自有其高故易曰謙君子有終吉夫易之占吉凶悔吝
四焉吉一而已而謙六爻專之高而不自高之功也伯
高伯高吾為子危之卑而不可踰吾知免夫皇慶元年
鞠有黃華雪樓道人

趙克敬二子字說

集賢趙君克敬既名其二子曰適祖述祖涿郡盧處道

字之曰承宗紹宗已而避宗廟之嫌也東平王肯堂易之曰承忠次忠禮雖不諱嫌名然臣子之道止於敬而已雖諱嫌可也克敬以余老友其子承忠又同禁林俾申其忠之義釋者曰盡已之謂忠則忠之道盡已焉耳苟盡乎已以之事父以之事君以之正夫婦友兄弟信朋友凡脩齊平治之道無一不備且父敬而子忠所以承先訓後亦至矣傳曰使民敬忠以勸不在君之父子乎所謂臨之以莊則敬孝慈則忠亦盡已之謂也盡已

之道無他學之古而已矣勗哉二忠

商繼顛子孫名字說

善者必傳乎曰君子之澤五世而斬矣善者必無報乎
曰積善之家必有餘慶矣顧其所積何如耳蓋論其人
則當積之至於終身論其家則當積之以世世愈傳而
積愈厚是之謂善繼彼所謂斬也特以一世之善而言
耳余讀集賢周君正平所為商君繼顛名字之說而喜
典刑之篤論也復喜商君父子以善傳家也又喜繼顛

之善繼內能顯其祖考外不負鄉先生之深期也嗟夫
使今之顯者人人同然豈非名教之望世俗之深幸哉
今繼顯子三孫十四繼者可謂衆矣繼顯既各命之以
名媿之以字訊余俾申其義繼顯之意蓋曰吾為人子
孫吾則若此今為吾子孫者庶亦如吾乎嗚呼人孰不
欲有子孫亦孰不欲餘慶然使為人子孫者皆能以其
祖父之心為心豈復有不繼者哉夫所謂君子者以進
德脩業為本而進德修業則貴於及時今繼顯之名子

皆以時而字以德則義方之訓切矣木之用不待贊彥之美不容稱脩而具之為羣材舉而用之為羣彥則繼顯之詒謀者又遠矣為之子孫者可不各思其義而勵其志乎曰時敏德脩時膺德進時中德庸者子也棣威桓武彬文杞柔棟隆桂實楫濟相和采禮槩平極高格通榦直棫才者孫也今年敏初以父任詣銓余因識之恂恂易良世濟將自茲始夫以繼顯材望之孚事業之著而其適長年逾五十猶未登仕版是亦可見其不競

不綑之教者然則余辭其費乎

祭文 祝文

祭余秋山廉使文

維至元二十有九年歲在壬辰春二月丙戌故江西廉
訪副使奉議大夫秋山先生余公之柩至自長沙次于
盱江郭南門之外後三日巳丑友生程某謹以潔牲柔
毛庶羞清酌告于公之柩前曰維公稟氣峭剛賦形敦
厖重如泰山喬岳肅如烈日秋霜蓋其得於天者廔故

其發於文學政事者類其為人此公之所以為公而吾之所以深敬愛也嗚呼今其死矣始吾游學于撫得公景定甲子所校程文讀之一時預選皆名流次年悉登上第吾時尚少於是始聞公名而未能詳也國家平一土宇公官于鄂叅政鹿泉賈公北方宿學涖政荆湖於人少所許可於公獨加器重吾時留京於是益聞公名而未及識也歲丙戌蒐賢來南公適在盱首以應詔公亦勇往不辭入覲清光大稱上意起家風憲往貳湖南

于時權要腹心星布暴置舉手搖足且陷譴呵公如快
刀健斧不避盤錯風采大振為諸道最化弦更張遷為
江右憲副鄉邦顛顛望公遄驅日月幾何凶訃遽至知
與不知失聲嗟悼嗚呼惜哉公之享年六十有四有壻
經紀家事護柩來歸有子雖尚童稚日可冀其成立公
死無憾也然公於不可為之時能為人所不能為之事
及今新政之始乃公行志之秋也僕公共昌正氣以報
主知誰謂公竟溘然而逝嗚呼痛哉吾官滿還家甫終

慈母喪事而公樞適至想公音容思與欸欸共談當世
事而不可得矣潔觴敬祭以寄一哀公之精爽能如平
生少鑒吾誠也乎嗚呼哀哉尚享

重脩南陽書院告成文四首

先聖

惟夫子為郡邑之通祀崇儒乃聖朝之鉅典南陽敝甚
無以揭虔妥靈度材鳩工爰作新廟仲春庀役長至告
成謹以塗盛制幣式陳明薦奉充國公顏子配

武侯

三代而下論王佐者惟公一人南陽祀之為鄉先正某鄉之願學者也欽若明命勉勵於斯修敝補廢職分當然幸底于成敢忘昭告

鄉先賢

某垂髫時來游斯學固已服膺公之盛心將指此來則遺規隳廢已甚竊效先覺遂忘其難經始於歲首訖役於仲冬殿閣堂房門堦窾與庶幾苟完日長至舍菜于

先聖先師告成也噫嘻微公基之今孰構之繼今以始
尚其相之

司土

惟神職司此土亦有歲年學之敝也為士子羞學之修
也為神人喜徼福訖役工徒無虞且謝且祈垂祐永永
郢中先墓祝文

仰惟高曾卜居古郢再世經營生計既定林廬在原地
兆于嶺牛羊滿村鄉田同井中惟百憂遂適他境今六

十年遺蹤未冷粵從徙居朱紫交映國恩固厚亦緣家
慶惟宣慰叔作藩南屏郢實所部因得歸省既封既植
且闢且整鄰曲之榮子孫之幸自茲以來又十溫清嗟
惟末孫早際明聖茲焉來鄂憲節是秉謂邇松楸可以
瞻偵欲去不能拘於簿領矐然長望徒有耿耿緘辭寫
心遙酌酒茗仰惟高曾英爽不暝尚鑒畢誠式回幽聽
相我後人以安以永

又

某效官此土庶邇先塋水遠山長尚隔千里茲霜露之
既降慨瞻省之末由爰遣常儀謹脩時祀仰冀靈明之
格少歆追遠之誠餘慶所覃式安且永

偕菴祝文

仰惟二塋相距一望松楸連蔭雨露分流而合祀有堂
猶循舊設近者幸成先志改立偕菴茲既畢工敢嚴遷
奉伏望明靈共格去故就新相敬如賓受烝嘗於永世
克昌厥後瞻岵岵以長春

乙巳春祀西高渠墓祝文

曩官于鄂稍近先塋今焉顧瞻又隔湖漢每遇歲時之
改不勝霜露之懷敢飭彝儀遙陳菲薦伏願俯歆微悃
啟佑後人家慶所覃其寧惟永

乙巳春祀武昌墓祝文

遠違松楸已再閱歲嚮風西望寸心盡然茲當雨露之
新庸致蘋蘩之薦伏望俯歆微悃安裕九原佑此後人
益綿家慶

己酉八月祀郢墓祝文

向官湖右稍近松楸暨列朝班雖專遣祭今已三載草木蒼涼况值兇徒肆其侵伐驚動泉壤不孝罪深茲來武昌實奉朝命因再削牘直于有司就寄純誠虔具薄奠霜露之感倍萬尋常仰惟尊靈俯賜歆格默垂幽贊妥佑如初

己酉十月祀武昌墓祝文

茲以使事暫留武昌瞻望松楸百里而近霜露既降中

心惕然專遣門人代陳時祭使事將畢躬拜有期仰惟
尊靈俯歆忱悃益安益固流慶綿綿

書 啟

答黃草塘書

某再拜草塘黃君教授足下往者客居於洪實與足下
同州里聞而不面之日久矣儼然造予喜慰參半又辱
携教編摩二書連繙數策已窺足下之用心幸甚幸甚
世無實學真識因陋襲弊苟焉自安至於上下數千百

年之間扶大經尊大緒立為一書暢所志而垂無窮此古聖賢所為也不意於吾州里而獲足下太息敬羨不能已已此其為惠蓋亦大矣而又侑之以駢文儷句溢口虛美殊非足下所宜施諸人者而僕亦何敢安受之乎且以足下精誠絕學大雅不羣使之紬繹金匱綜理木天固當穎然出羣士之表顧猶抱其所言下教於潛深伏隲者豈非以相為引重朋友之責而不言誰知其志不得不姑為此屑屑耶夫薦進名士大夫當路貴人

之事也異時僕在官聯有所識知未嘗不噓以微吹如戴晉人之吹今則謝病退處非事所宜故於足下不過徒太息敬羨而已方今文治燿興無昧弗燭倘足下之聲光益盛亦何待衆多之口而後顯哉劇思與足下談體有少苦厚意不可不報故破此默默而以書惟足下幸察不具某再拜

荅存心何希之自脩書

某與執事相知非一日獨以出處如參辰不獲一展平

生之好乃若承風藝林翫芳玄圃其澡雪厭飫久矣今者辱書蒙稱謂甚厚局縮愧悚良不敢當也往者士大夫徂於流俗既不以古人自期又復不以待人故其誇頌云云者其心豈誠謂然哉亦曰人施於我而我悅我以施於人宜以悅也言之無諂辭受之無歎色一彼一此以是相先豈非既不自期又復不以待人乎今執事過聽曲愛而寵光之雖去流俗萬萬然溢美已甚終不敢當也伏惟先德醲粹宜託之命世之筆而願以見諉

豈亦出於過聽謂可遂不朽之計而然耶此誠孝子慈孫之心也古之不朽有三立德立功立言然德有厚薄功有淺深未必並行而俱遠也而能使千載之下聞而知之者猶若見而知之是豈非立言君子之力哉故夫子曰言之無文行之不遠今某誠自謂拙於言辭不足以光昭先德以塞孝慈之心而又不可拂也勉叙次來示以復盛指筆墨猥攘多慚見知何時良逢庶幾傾蓋不一

答何端奇書

乃者與太虛談樂聞足下名德之高問學之懿相距數
舍言讌無從徒懸渴心耳學之不講久矣豈徒學者之
罪亦父兄師友之過也夫子曰君子以文會友以友輔
仁蓋仁其表而文其景也後之言文者或不然不鄙惠
書猶及後生之學甚盛甚盛請誦所聞與足下論之文
者何也猶之卉木之葩華氣之所鍾鬱勃充盎故其所
發輪囷紛郁不主一態然皆出於有本有元初不期然

而然者世俗因倣而為之雖形色肖象無一不如人之見之者亦未始不以為如也然即而求其神氣流行潤澤充滿則又若漠然者何耶其故可知已今之為文者類此故未有無表之景也亦未有不式其表而惟景之取也蓋聞古之測景者或於陽城於滑臺於交州必有定所而后以考寒暑之中若持竿而行仰而俯視曰是亦景也而可乎今者幸甚足下猶肯以文章風厲後生然後生之病無志者不論有志者政在於持竿視景耳

倘足下併有以教之滋益幸也足下又不鄙欲僕為之發題僕自顧素非能文不過少壯以來事役四方聞見積久故於茲事稍能明其寸尺若欲使之操斤執引與工師相倡和及以其氏名為所緝之重則足下不免過聽誤計焉耳狐裘羔袖可乎然意不可孤抑亦朋友之責勉承所指或取或去政在識者紙短心長書不能盡願幸無訝

賀某學士新居啓

伏審分玉堂退食之間開甲第富有之美南窓北牖嘯
傲羲皇上人左圖右書商略宇宙內事風清日麗心曠
神怡問揚雄之竒方隨厦燕助右軍之筆竊效龍鵝笑
而受之幸莫大矣

賀張疇齋承旨續絃啓

伏審法喜重諧吉消載協杜陵野老政湏燕玉之謀山
谷閒心始笑湯婆之拙允為佳偶永共歲寒菲爾俗儀
聊申賀意

雪樓集卷二十三

欽定四庫全書

雪樓集卷二十四

元 程文海 撰

題跋

題趙仲遠所藏韓幹三馬

仲遠出三馬圖不著何人作然畫肉不畫骨奚官皆唐人
大類韓幹幹以畫肉見稱吁畫馬可也相馬以是不
失馬哉仲遠慎諸

跋魚山李氏社倉事後

官有常平私有社倉皆所以利民也常平廢不復舉社倉之存者亦無幾矣今年春余歸母喪於南城之南主于魚山李氏識魚山翁之子仁壽獨能嗣其翁所立社倉規制至于今不廢吁可謂難矣仁壽老猶嗜學其才足以用而隱居求志能不失其世守也豈偶然哉

跋虞子及家藏趙千里義鶻行圖

義鶻事子美得之樵夫傳至今以子美詩故使不遇子美一時且泯沒無聞况可垂千年乎然則未可薄待世

之人以為不鵲若也有如此鵲而名湮滅者蓋亦多矣
悲夫事固繫乎其所遇也夷齊亘古今義人也遇夫子
而名始彰雖然夷齊豈求名於後世哉

虞子及家寶箴此卷蓋趙千里所畫至元壬辰夏五
余如京師子及遠餞袖以見示與鄧聞詩吳幼清同
觀于吳城山之寓舍三復嘉禾葉侯跋語簡而有味
無庸復贅辭以子及之請也聊署紙尾而歸之時月
離于畢程某識

跋魏鶴山帖

鶴山翁記州縣學十教究學道之本原藥學者之痼疾
黔陽其尤深切著明者也小有才則溺益深居近利則
壞逾速又黔陽一篇之警策翁曾孫資深出示此卷乃
在渠陽時與李肩吾賡韻筆精墨妙又復明揭二語以
誨人惟恐後生晚進讀文字只作一場話說過也前輩
喫緊教人如此三復降嘆

跋靜恭楊文安公庭傑遺事

昔余季父西渠翁繇淮南幕府歸省嘗手文一篇愛賞
不置曰此同僚見山楊公之作時余尚少未能省也及
余與蜀人唐靜卿同直翰苑言眉山楊氏經學文章之
盛為詳蓋靜卿楊所自出獨余以生晚不逮前輩風流
為恨則思識其子孫焉今年歸自京師幼清來相勞苦
視其篋有見山公之子焱翁所述文安公遺事與王文
公遣妾事大類然一出真實無毫髮矯亢意或又過之
詩曰相在爾室尚不愧于屋漏此君子慎獨之學也楊

氏之世宦宜哉見山距文安六世位亦通顯矣而無緡
錢鍾粟遺其子其所以遺之者蓋有以也焱翁字揆卿
初以父澤授法曹復以進士貢禮部今隱不仕貧甚而
守益堅余未見世德如此而有不昌者也揆卿俟之至
元癸巳陽月下弦廣平程某識其末

題姚抑齋送徐丞之崇仁序後

夫子曰吾之於人也誰毀誰譽如有所譽者其有所試
矣浮光徐君繇省從事佐望邑其行也抑齋姚端夫有

贈言焉端夫正人慎許可而所以與徐君者甚厚期徐君者甚深也豈徒為是褒美而已哉君治邑未暮年而賢士大夫多稱之新一堂於公署之北名之曰相山以端夫贈言至而徵大字於余相山直邑之南高聳特起自昔以祠樂巴巴漢良吏也所至有功德于民與杜喬周舉諸君子並受朝命為使者行部郡縣君日坐是堂對是山追想古人之遺風而尚友之以為世良吏則其名其堂當與是山相為不朽余之字又何足為輕重乎

而端夫所與所期真為不虛譽矣夫樂道人之善余與端夫同是心也既為書三大字而復識端夫贈言之末如此徐君勗哉至元三十一年歲在甲午春分遠齋程某書

書鄒次陳所藏先世告身後

余少游臨川覽郡志慕宜黃鄒公之為人公諱極登治平四年進士第元祐初提點江西刑獄事官滿勾祠未幾致仕時年猶未五十日與方外異人逍遙烟霞泉石

間固急流勇退仙風道骨中人也然自昔賢人君子可
大用而不及究者其後常有人而不知公之子孫為何
如癸巳冬入閩獲與公之七世孫次陳偕叩其家世乃
知公之後以名登于禮部吏部者累累有之且出公提
刑告身及初任太和主簿告身示余余於是重有感也
嗚呼世之為人子孫而不能保其先世所有者多矣何
獨告身也哉次陳字周弼少年掇世科文學器識亦既
光于前矣而所藏先世告身又能至于今不失以為世

世子孫傳家之寶則公之後豈不為常有人矣乎涪翁嘗與往還集中有曰松滋令者公伯子云至元三十一年暮春之初遠齋程某識

書王西溪中丞徐容齋參政贈邵炳炎手墨後天下初一閩士邵君炳炎詣闕上書天子下其議踰年有命貳會府兼領一道學事未暮年去官再詣闕上書有命參議行省為上介使海外不至而復於是君倦遊矣自北而南走諸公間以歸一時多贈言焉及昇中丞

西溪王公書歸去來辭歸盤谷序以贈及叅政容齋
徐公書簡齋送張仲宗歸閩中詩以贈烏乎二公之心
豈特以華君之歸而已哉是誠有羨於君之歸也昔之
君子之出而仕也役於人以憂人之憂者也伊尹傳說
辭耕築而起若不得已然未三聘未旁求二子將終身
樂其所樂而已則夫後之君子之既出而適歸也能不
役於人以憂人之憂而得以自樂其樂非天下之至樂
歟余是以知二公之誠有羨於君也余備位南臺時事

二公為長故知二公為深王官將滿告歸未及遂而逝
徐之心猶王之心也至今縻于浙欲歸而未可豈特二
公有羨於君而已哉余亦誠有羨於君也夫以君之得
以如張如李如陶而歸也余之未得以如君而得見二
公之所書也不有似越流人之見其所知乎如之何其
不喜而贊也雖然張之歸閩致其仕也君之歸陶之倦
而還耳其遂無心以出乎哉余未去將又為君書昌黎
送石處士序凡去就出處何常惟義之歸昌黎語也余

於君亦云至元甲午四月晦廣平程某書于閩海憲司
之繡綵堂

跋朱文公通鑑綱目橐

遂良出示通鑑綱目橐一幅書建武二十六年七年事
曰朱子之筆維昔道學諸儒於字畫蓋不數數然也獨
朱子少嘗學書而其字畫竒偉卓絕片紙流落人之好
之寶之也殊尤雖然朱子之為人綱目之為書其所以
可好可寶者夫豈以其字哉覽者詳焉至元甲午中秋

廣平程某識

題興化路學修造疏後

按莆廟學宋咸平間方著作儀所建迄今三百餘年屋老可想矣往時士大夫談所學必曰自孔氏然稽之誌載儀初始後未聞有出一語及改作事三百年如天覆燾之澤一畝之宮輒憚其難若此而郡冷掾欲以區區之志起廢於一旦談何容易余於是且壯其志而嘉其未請也因捐鶴俸復書其後為方今士大夫學孔氏者

之勸云元貞元年十一月二十三日廣平程某書于三
山繡綵堂

跋山谷草書徐禧送靈源上人二詩

涪翁書徐德占贈靈源二詩豈亦喜其清新耶德占永
樂之舉欲因熏腐之餘以立功名此豈足以語方外之
學者想其捋湏揚壺喪身覆衆之狀已歷歷在源公目
中矣大德元年四月二十日白雪道人觀

跋東坡帖

蘇公坐謫時有在都城見叔黨而障面者及遷僂耳鄭
嘉會靖老乃能以海舶載書千餘卷為借亦可嘉已公
和淵明贈羊長史詩以謝之有好學真伯業比肩比相
如之句千載而下知有靖老士烏可不自附於青雲哉
此帖言所借書叔掌如法前輩借人書籍愛護如此皆
盛德事吾黨所當服膺

跋大慧帖

大慧坐張橫浦謫衡陽僧中之豪傑也前輩謂使其冠

章甫衣逢掖力量氣魄當是晦菴象山一輩人今觀與
其徒作別書如此真蔡子應所謂靈岩山下大脫空者
合爪起敬

跋商季顥所藏王鹿菴先生詩

至元丙子余至京師拜承旨鹿菴王公于玉堂之署蒼
然而古雅凝然而敦龐望之肅如也既而獲近清光蒙
聖眷實維公獎進汲引之力公長史館余備負末屬朝
夕接緒言故知公出處為甚悉初山東反仄公豫料其

敗棄妻子脫身來歸先皇帝嘉之寵以殊禮其告老也
上東門祖餞榮於疏傳兩宮錫賚特厚賜田給稍官其
壻於鄉郡以奉之晚歲雍容里閭天佚壽齒寄情賦詠
蕭散閒適蓋風韻似香山而忠義剛介之氣則又過之
歲月荒寒墓木已拱每念游從之舊未嘗不以之興懷
來閩四載同寅東昌商公季顛一日示公居山東時古
詩數首束衽端誦宛如侍几硯時也惟公之趣與香山
同故其詩不期而同惟商公之趣與公同故所好亦不

期而同余雖不知詩而知商公與公之所以同者又有出於詩之外也泛濫烟雲俛仰古今不知同余心者又何人哉大德丁酉暢月既望謹書

跋梅花集

梅花之詠萌於六朝達於唐盛於宋以吟為事者謂無梅字為俗故有作者必曰梅何其多也然廣平一賦無傳後來傑作膾炙人人者亦止一聯半韻耳又何寡也百十年來賦者百數家和者又數十家梅且遭矣抑

有疑焉余留黃金臺邊二十年意雪霜買買非江左比
此花竒絕傲兀當有大賞音而諸公間不惟無一字及
梅花且未睹豈北南風氣固爾殊哉余歸自閩得閩士
謝君無疑百詠讀之於梅不可謂無意者屬余多故未
暇細論君年壯方有四方之事異時馳騁風雪中孤標
雅韻挺然特出百詠當有新什余亦當為君大書特書
不一書罔俾此兄笑人寂寂

書何希之試策後

宋進士試訖甲戌是年甲科余首識第二人路君萬里
繼識第四人熊君朋來蓋余家寓豫章二君皆豫章人
也第一人王君龍澤仕國朝為監察御史始識之第六
人何君希之臨川人聞其兄弟四人相繼中進士第晚
歲隱居無求翛然世外自守如澹臺子羽之正而宰邑
者每禮於其廬可謂賢已而未及識或以君所試策示
余余讀之竟竟而歎何歎也既往盡歸閒指點未來須
俟別枝梧邵子云大德己亥十月之望廣平程某書

題山中白雲編

梁公大節唐一人耳太行片雲尚能感人至今因想公
之忠誠所以感當世者此之充也然慈母之線每動念
於游子是獨何心使其日在膝下仰睇雲浮千貌萬態
亦何足芥蒂阿奴碌碌誠可羨也盱江山長巖季安示
余編詩題曰山中白雲余且有感矣曩留京師去雙親
萬里嘗取遠以名齋以志遠遊之過迨今回首徒重潛
然盱汝一衣帶間君且歸矣山深酒熟奉以為壽從板

與賦閒居試問天壤之內孰易此樂

題長沙譚生卷

臣子盡心力以為其君父本人心天理之常耳自忠孝之名立世道亦槩可知宋之靖康國之大不幸也而譚君之君之祖得為忠臣長沙之俘家之大不幸也而譚君之身得為孝子余覽其銘詩為之廢卷三歎古人云求忠臣必於孝子之門亦懿哉譚氏之傳家也

題趙方塘作劉子遠字說後

余與方塘翁同朝者餘十年別之亦十年矣未黃鶴讀
所為劉子遠字說如旦莫語時也為之悵然且人生能
幾十年今乃屢十不一十耶雖然自其可久者而觀則
去之千萬里後之千萬世猶旦莫耳苟營營於毀譽沾
沾於耳目雖名喧勢震自以為遠矣而非也然則十年
夫何足歎向余築室京師題曰遠齋蓋有志乎是而今
吾猶故如文卿之善教子遠之善學庶其不負方塘翁
之祝也喜而書其後

跋立齋字後

吏以刀筆為譚仁義者所賤久矣法選吏於儒旨哉然
冒以入者十九於聖賢立身之說如梵夾然余官中外
垂三十年閱金於沙燼然而光目為之眩持節湖右吏
有朱芾者進止氣貌儒也視其言亦儒也余方以吏事
責之弗暇及儒一日進請余書立齋字問之則曰小室
之扁諸儒亦既銘序之矣因出諸袖間則或獎或承其
言立也章矣噫立未易言也亦未易能也以其所頌者

為規而不以為喜庶乎其可

題楊從善卷後

大德四年秋蒙恩使湖右舟至吳城有儒其體貌者頎然迎拜曰湖右書吏楊從善與語質溫而業廣意靜而志勤蓋稱其體貌也有字乎曰希元於是携之偕行者半月既至凡抱文書以前者余一一束以吏事嚮之頎然者亦不見其儒矣然每思盡江行未盡之語而未暇一日持卷軸來祈一言視之大夫士歌頌其讀書之竹

軒余乃知所謂稱其體貌盖有本源而竹與軒特筌蹄耳又請余書大字曰中菴儒以無過不及為中法家者流輕重適平為中其義一也子方緣吏業儒倘於此勉焉日孳孳焉則余之所謂體貌特令之所見而已又豈可量哉子今遷屬湘南行有日余於竹有所不暇言湘南竹鄉也有賢使君曰踈翁簡書之暇子其端拜於庭請問竹之所以為竹者五年三月晦前一日程某書于歲寒亭

重題羅生卷後

後十有四年余官湖右而恭有之子將其父命來請曰
僕老矣弗能游矣惟是辱公贈言今篋之如新敢介永
德以見且謁教焉向余承乏南臺齒髮壯志氣銳下筆
疊疊數百言不休字畫亦勉自振飭年運而往舊蹟解
后至前幾不自識若此卷者是也於是頌永德曰老者
豈獨而父哉詩則我既言之矣進而論其本則喜怒哀
樂之未發謂之中發而皆中節謂之和表裏二者而性

情之詩其太倉稊米也豪髮無遺恨波瀾獨老成昔人評詩云爾然則老而後成是固一說也子歸而求之

書趙公勗齋記後

至元二十六年權奸秉政民物騷然僕以侍御史自行臺入奏覬有所悟權奸聞而大恚請必殺之賴天子聖明屢請而屢不許諸大賢亦憐其志並加覆護幸免虎口而勗齋趙公當時大賢一人也覆護尤力蓋公以忠勸發身以愷悌接物勞於王事有年權奸之時亦多故矣

強者激弱者遜怯則附而公安步徐言於其間全正氣
於惡候偃巨防於橫流故彼不至極而隨敗公之功為
多而非獨於僕為然也然公不自為功衆亦鮮能知之
晉楚離居萬里相望辱寄巨軸于武昌且命曰其為我
益一辭視之勗齋記也夫公之所以名齋者胡君之言
信而有徵矣僕之文不如胡公又將何辭乎雖然僕蓋
有所感矣是非之公固有歷千載而猶未定者毋怪乎
焚林抱木之徒也然則不知而不愠者信君子矣惟勗

其在我而已者斯不亦又君子矣乎僕於是而益知所
勉矣抑胡君之所言或者亦僕之所知而僕之所知胡
君未之見焉用告于讀斯記者至於公之所命僕蓋無
以復之也

題象山先生遺墨後

朱陸二公來往翰墨情與甚真若此帖者甚多余家亦
寶數紙恨不使安有異同者一一見之

題王氏遺墨後

學者僅知初寮公以文章獨步一時不知其得所矜式見其出入宣靖不知其不肯詭隨蓋公及識東坡知所慕用字畫亦儼然令尹中郎復生學者其可無見聞者嘉叟從張魏公游人品自不待論翰墨猶犖犖有奇氣逮至提刑公世雖益近而家聲則益遠矣今德植又能自絜於洙泗材諳美茂有絕塵之姿家聲由是將益大不遠千里需余一言是豈非繩祖武之盛心乎惜吾無以助其見聞而徒黔紙尾耳雖然德植今得庠序課最上

考功金門天開穆穆布列其見聞觀感豈江海之濱之
比哉固將有下堂執手以升者當是時德植勉旃請伸
此卷

淮水清王氏寧枝葉美茂他姓莫如也山長君族有
三槐家有初寮所宜世濟其美今君名庭槐而字德
植濟美之志可謂決矣然德植雙聲不利於口曷不
遂曰濟美坐客咸曰然乃書以易之

題淵明圖

當其時或交臂而不之識亦既遠矣乃共以筆墨追求之聊代淵明一笑

書五代死節傳後

大德五年御史詹君奉使湖廣余以官守間獲款語聞君談忠孝大節慷慨激烈至五代王鐵鎗事尤凜凜生風及詢家世知為總制公之適子也總制公宋末戰死其忠勇與彥章同其死之事又同然則惟其有之是以之似特為君發也暇日因取彥章傳繕寫而歸之筆

墨非工高山仰止之意不能自己焉耳昔黃太史暗寫
孟博傳誤處不過三四今余展卷尋行然後落筆而猶
不能無誤人之相去何啻九牛毛哉併志余愧

跋郝仲明御史自叙

至元丙戌余待罪南臺始識今監察御史郝君仲明見
其於吏事明而有斷心竒之而未暇與語也既而余言
事忤時宰羈留京師時仲明在內臺間得與語而未
知其學也戊戌余歸自閩與吳幼清論易學則曰江西廉

司經歷郝君於此用工專而且精余駭曰吾仲明耶余與之共事久曾微一言及於易仲明之深藏若虛固可喜而余之闇於知人則甚矣自是往來于胸中思一見而問焉及來湖右會仲明來監選事乃始扣擊一二於澹齋許君所得其自叙而讀之疏其師授之源發其心得之蘊固皆吾平昔之所未聞者益恨余之闇於知人也噫易更聖三有道四說者非一家得此者遺彼未易言也余起諸生沉埋傳註至研極則往往口戟而舌縮

仲明乃遍參諸方深造道妙如此盛哉惜方縻於公事
未能難疑問荅盡發祕藏姑書此以識余過他日書成
當膝行順下風以請

題楔帖

曩聞遊五臺者人人言見文殊問之則或雜雲物或現
光相或渺渺然山谷間又問之則曰神人其可即哉澹
齋示此帖因識所聞

題張君用贈行卷

名爲天子耳目之司任無小大皆不可苟臺總於上憲
列於下監察御史絡脉於其間皆所以達聰明目繩愆
糾繆扶治本清化源也顧使庸悍詭墨之流得執簡牘
以吏於中焉嘻其非矣余承乏臺端凡再考去之十年
耳今之官往往曩之吏焉者然則可弗重歟穰人張君
用余來湖右所貢吏也臺不以爲非而俾吏察院將行
手一卷以進視之則陳說禮法是非蜂起余卷而謂之
曰爾知禮與法乎畔于此必麗于彼合乎彼亦必合乎

此未始有同異也。今議迂闊者必曰：儒詬深刻者必曰：吏禮豈迂闊而法豈深刻哉！然持衡而視其兩端，若一俯一仰焉，非平矣。甚則權墮而衡折，爾余所知也。其亟行乎！慎爾所持，毋負所舉。

書鄧中齋名謝氏三子說後

至元戊子，余官南臺。時中齋鄧公客于昇傾，蓋劇談互有所發，別去十五年，聞其訃於武昌。又明年，謝君汝霖持其名，三子說來讀之，意覈而言慤，猶若對面語也。當

是時汝霖齒髮彊壯意悟飄洒往來余二人之間余亦志氣方銳不知老之將至今汝霖諸子皆振振濟濟頎然出於其父歲月不問可知然少者壯壯者老者死此天道人事之常而於中齋所謂攸好德可勉自貽哲命可知者當惕然以思耳太上立德其次立功其次立言此學者所願學焉者謝氏三德倘能以中齋之訓自勵則於立功立言如木之有枝泉之有流耳然而石者泉之母也密則清土者木之基也厚則茂未有身不立

而能是三者也亦未有能是三者而身不立者也三德其懋敬之故待中齋舉其二而缺其三猶有所待也汝霖將何以復之乎

題家人經傳衍義後

家人之卦辭曰父父子子兄兄弟弟夫夫婦婦而家道正正家而天下定齊景公問政於孔子孔子對曰君君臣臣父父子子嗚呼使君君臣臣父父子子兄兄弟弟夫夫婦婦豈有亂與亡哉夫惟聖人耐以天下爲一家

故治天下之道備於家人一卦非已備也所以爲治道之備者始於此也嗚呼自天子以至於庶人皆父父子子兄弟弟夫夫婦婦獨非聖人之治乎予於是深有感於此書矣有問治天下之道於德亮者請執行義以往抑以風自火出之象推之風以動化言火以家宅言蓋曰化天下必自一家始也爐鞴之說固善若曰火自風出乃可德亮謂爲何如

書桂林瑞芝圖後

天地好生人亦孰不畏死而欲生然生不可必求而有
或力求之者學仙是也死非所求而終若求之者囚辟
是也萬死一生之際而能使之必生其惟良醫與仁恕
之吏乎夫其使之必生也非能益造化之數也非敢亂
章程之名也盡吾心而體天地人之心以求之耳故曰
求其生而弗得則死者與我皆無憾真誥曰人能遍服
五芝可絕粒輕舉本草曰凡芝皆延年起死彼學仙與
醫者能言之未必得之今桂林傳舍之芝見於仁恕平

反之後是則所謂芝者誠生氣之祥不死之劑乎然仙與醫雖得之未必效之果而及之衆也且仙者之求其生未若醫者之求人之生也醫之求人之生又未若仁恕者求人之生之公之溥也然則芝何足圖如王君者乃可圖耳

題羅伯達卷

余讀諸公贈羅伯達文序而知士之不可不求知於人也伯達譙人自湘憲改吏湖右者二載余雖知其老成

歷練介然有守不激不隨同儕有疑咸咨之然亦不知其名父之子所謂介然有守不激不隨者蓋淵源有所自也大德癸卯波遷桂憲余方惜其去無以尼之將發手一卷求贈言余讀之曰嗟夫矯矯亢亢惡圓喜方者果皆晚遇耶卷中諸賢其許與不妄彼既已知之矣復何庸贅獨以垂老無罪而入瘴癘地又奪其儕之所審決者是則可念耳若曰必余言而後見知於人則人之見知者亦淺矣知不知非余之所知五嶺皆炎熱宜人

獨桂林是則子所當知者

題姜尚志所述祖德卷後

爲人祖考之心孰不欲其子孫之皆賢以永其家者覃
之心思守之行事顯之教言至於著之彝器而祖考之
術若幾窮矣子孫亦嘗以其心而反事之乎知此則知
姜生尚志之心矣欲其祖考之賢聞於人顧肯甘於身
之不賢而聞於人哉雖然春生秋殺孰主張是亦盡其
道之當然者故造物者以無心為貴令人言濟衆之事

必曰陰德夫既曰陰德矣何庸人知宋莒公之蟻芥出於戲劇而其所報盡於世俗之所羨慕而不可得意彼亦一橋也其用力甚易而猶若是然則尚志亦安之哉何庸人知且詩不云乎毋念爾祖聿修厥德尚志亦安之哉

書傳道集

夫子曰予欲無言又曰吾無行而不與二三子者然則以言明道非得已也道至伊洛而大明逮紫陽益無餘

蘊凡公所著與其門弟子之記錄何啻數千百萬言或不可數計唐虞以來於斯為盛今故家遺俗存十一於百千公之族胤亦或淪落其高第弟子子孫徒藏其片言隻字以為身榮以為家鎮嗚呼是亦可見道之升降矣若止齋先生清規懿學讀其宰石之志凜然平生猶足以立懦夫於百歲之後其子孫又能世其學而不變君子之澤豈必五世而斬哉夫止齋所傳之道堯舜之道也堯舜之道孝弟而已萬君方以其學而及人其必

自茲始

題唐名臣言行類編

人有古今不同時而合志往聞斯語今親見之余觀中
齋楊侯拳拳於唐之名臣緝其行事以爲斯集其慕用
之意已深夫豈以安邊境立功名而自足哉然逢時展
用孰無此心今侯盛年敏志況古人所就有不足爲而
又生當其時亦何所欲而不遂唐事特其土苴耳雖然
房杜爲唐臣稱首而何以傳無可載之功竢侯造朝言

還當相與一一評之

跋唐括子舉遺安堂記後

躬貴富而幸爵秩廣園田以遺其子孫者欲其安於貴
富也處賤貧而以一經一業遺其子孫使之安於賤貧
者有幾蓋有之矣其子孫能安其賤貧者又有幾思德
公之言讀翰林之記而後知世固未始無也子舉家遼
東昔管幼安索居于彼者數十年聘召者屢而卒不至
至使時君畫其衣冠容狀問其起居辭令以慰願見之

心若幼安者真能安矣抑誰遺之乎吾不知德公子孫如何今子舉好學自脩安於先訓吾深有所感矣喜而書其後

題翟氏貞節

柏舟之詩起於父母不明其志是故惓惓懇懇永歌嗟嘆覬於聞者閔而舍之也使若翟氏泯然自由於志節之中內外相安無奪之者則三百五篇無此篇而二千八百餘年之後不復知有衛世子共伯之妻矣然則所

遇亦有幸不幸哉抑未知夫家爵里氏名若貧賤而能然謂之知義富貴而能然謂之秉禮禮也義也古人先得我心之所同然而其流行不匱於閭閻閩閩驗之尤信

跋揭曼碩文藁

余識揭曼碩不四三年初識出其詩文知於茲事必收汗馬之功自時厥後屢見屢期若王良造父之御駸駸然益遠而益未止何曼碩之敏且巧若此乎柳子有言

吾之俯也滋甚

題南翁編

五色不斲眩而目自眩五音不斲感而心自感至理之中有自然者存不可以意求而力索也猶之於文三才之所生也宇宙之所馮也治忽之所徵也而或者不察置盂水而吹之曰此亦天下之至文不亦惑乎南翁深於斯道其發也如豐山之鍾其成也如匠慶之鑿吾於是而知茲事未嘗忘特猶儻之與忽不可必其相遭耳

喜而識之于篇抑文章一小技於道未爲尊少陵翁謙以自貶而情與不能者以藉口吾欲因南翁編告之

書張文振實記後

士有常言曰宇宙內事即已分內事此言誠是也然必志與才並時與位偕而後可行斯言往余聞文振於朝行既又識文振於閩粵知其以宇宙內事爲已分內事者然猶未深悉其平生歸自湖右聞父老談張史君之美者踵相接今觀斯記所謂功崇惟志業廣惟勤者耶

他人觀之未必知之知之未必信之余則固已知之而益信之矣題曰實記允非欵言雖然志也才也時也位也制於已者二而非已之所能制者亦二今文振豐於三而少嗇其一而非文振所能制也豈非制之者猶有所待乎不然翼乎如鴻毛之遇順風沛乎如巨魚之縱大壑矣何事不立哉夫制之者有所待以否余雖不知而事之有待於人者皆是也然則制之者尚何待乎

題熊氏生意橐

天地以生爲心聖人以天地爲心然天地之大人猶有所憾博施濟衆堯舜其猶病諸然則兼天地聖人之心以爲心者其惟醫乎醫之於人也技若賤而甚貴施若狹而甚博也俱民也而死生獨寄焉非貴乎身不必徧也而其書公焉非博乎醫之道與聖通矣臨川吳君幼清吾所敬也熊君又幼清所敬者焉予取熊君之書讀之其術周其說博信乎可敬也已况服膺唐虞三代之言以文之益可敬也已不達則爲良醫熊君之志達已

乎惜子不早與幼清從事於斯以達其志也因志吾志
書何安子四書後

四書至朱子註釋精矣然朱子修改易箒未已天假之
年則今本猶未爲定本也勉齋之說有朱子所未發者
雙峰之說又有勉齋所未及者亦可見義理之無窮矣
後之讀者於先儒之旨曾未貫徹而或有妄肆誹議者
焉一也庸一也妄其失惟均鄉貢進士何定夫能於朱
子之說有所發明不阿隨又不詭異可謂善學者矣惜

乎泯泯無聞於世也其子捧其父書求序引欲以傳於世余嘉之爲書其後他日當與黃饒二先生之說並傳定夫名安子自號志軒

書何太虛集易象後

聖人俯仰遠近取象以畫易蓋不可窮也彖爻之辭說卦之贊因其所有言之耳而後之註易者曾莫之及間及者往往穿鑿傳會不出乎自然此朱子所病也故曰文辭象數或肆或拘何君太虛以彖爻所取象類而析

之得之者固多矣昔余在集賢見台州一老儒日以錢布卦觀其象得之者多親切吾友吳幼清亦言曾於古祠香爐中取炭燼畫卦於案觀之此卦通又滅之畫他卦豁然有悟嗚呼安得三君日相聚共竟斯事哉

跋麓泉記後

盱余明可工小兒醫求余書麓泉二字扁其所居之室吾友吳幼清爲講麓泉之義而記之無餘蘊矣復求余言今之術者曰醫也星命也地理也談相也星命地理

與夫談相者口舌爲大耳精不精未害也惟醫不可以不精而其計效目前亦豈能如星命地理與夫談相者之迂且誕乎哉古者醫師之職歲會其成十全爲上十失三失四斯下矣漢詔問太倉公方伎所長及所能治病者有其書無有皆安受學受學幾何幾嘗有所驗何縣里人也何病醫藥已其病之狀皆何如誠以醫者人命死生之所係要非可以虛譽求也幼清記麓泉之義而不記其驗吾家孫子三歲而病謁諸醫或曰驚或曰

風明可一見曰此傷暑也飲以一齊而愈吾弟女子昉
一歲而病瘍既苦河魚三日諸醫却立明可飲以三齊
精神如常時他小兒賴明可而活者復多計明可出入
城市其所療所全當不可僂數惜未有記之者自今以
往某病某證以某藥已錄而記之他日詔問執此以往
而不在余區區者之一言也

跋韓生夢康樂字卷

通於神明光于四海無所不通此孝子慈孫之能事也


蓋天地間惟一氣耳人生其間得是氣之全由是理之正則遠而天地近而父母推之以及人之老之幼皆是氣之流行而安有扞格而不能相通者昔之人有能由是理秉是心而貫於微顯者不可遽數已嘗試言之齧指而心痛微而顯者也見饋而泣涕顯之顯者也觀於此則韓氏子之夢寐誠可謂微而顯者矣嗚呼人於一髮膚之不若人非至痛甚害於身猶或視之愒然况夫形骸之隔哉余於是不能不深有感於斯文矣抑由古

以來若韓生之爲子者未可謂無人也而或不表於世以終其身者何邪寧非有幸不幸乎然而非孝子之務也傳不云乎親吾親也雖然孝子慈孫之心是亦可念已

題李雪菴臨諸家法帖後

具一隻眼然後能識又須具一隻手然後能臨今觀此卷是能以一手眼化爲千手眼者蘭奢蘭奢

蘭奢華言好也



雪樓集卷二十四